

Dess kann kooner abheern

Was denkerr denn iwwer die Noochrischde vunn de letzd Woch?, hott de Karl omm Stommdisch gefroochd, de dickste Hund iss joo dess meddem Abheern vumm Händy vunn de Fraa Merkel dorsch de Amis ihrne NSA, odder?

Doo seet de Schorsch: Enn gons dicke Hund! Unn donn stelle se sisch noch hie unn saache, dess muss alles su soi weesche dere Sicherheit aach vunn uns Deitsche.

Isch saach: Iwwer dess Abheern reesch isch misch gewaldisch uff. Weil wenn die sisch noch nitt emol schenniern unser Konzlerin abzeheern, was werrn die erst mett uns mache?

Seet de Schorsch: Misch kann merr ruisch abheern, isch bau koo Bombe unn will aach nix kabutthaache.

De Karl druff: Awwer du babbelsd emol mett doine Kinner doodriwwer, dass ihr emol e paar Daach fortfahrn wollt, unn doo konnder nitt egal soi, ob ooner mettheern dut unn donn waaß, wonner enn Haufe Zeit hott, bei eich die Terassedier uffzeheweile. Dess iss joo dess Schlimme: Wenn die Amis jeden abheern kenne, kenne die Gauner dess aach bald. Unn ess gieht joo noch nitt emol allons ums Babbele, aach dess Schreiwe uff emm Händy, su e SMS, kenne die aach lese.

Wie dess nor bassierd, moont de Karl, awwer isch denk merr, weil heit alles iwwer Funk gieht, vumm Händy uff enn Satellitt unn widder erunner uff die Erd, doo brauche die nor irschend su e Gerät meddere Antenn dezwisezeschalde unn schunn kriehense mett, was grad gebabbeld odder geschriwwe werrd.

No ja, moont de Schorsch, awwer die Händys vunn su wischdische Leit wie die Konzlerin odder saache merr mol de Chef vumm Siemens, die sinn doch verschlisseld unn dess misst die Sach doch zimmlisch kompliziert mache, odder?

De Karl hott meddem Kobb gewaggeld. Basst emol owacht: Bei dere NSA hogge verrzischdausend Leit, die hawwe nix ze due als wie Daach unn Nacht jeden Mensch uff de Welt unn besonnern Polidiker unn grüße Chefs oozeabbe, unn wennse erst emol enn Kontakt hawwe donn dauerts nitt long unn die hawwe die Verschlisselung geknackt. Vunn doo ab isses gons oofach.

De Schorsch hott sisch omm Kobb gekratzt. Unn die Kerle bei dere NSA kenne alle Sprooche?

De Karl hott geniggd. Alle Sprooche, aach vunn de Eskimos unn de Südsee-Insulaner.

De Schorsch druff: Kenne die aach flerschemerisch?

Isch habb gelachd. Naa, Schorsch, dess kenne die bestimmt nitt.

De Schorsch gons ernst: Ei doo misst merr de Fraa Merkel saache, die soll nix onnersders als flerschemerisch babbele, doo kenne die Amis grad mache wasse wolle, die kriehns nitt eraus, wenn die meddem Gabriel verhonnele dut. Der misst allerdings aach unser Mundart kenne, donn konns kooner abheern. Unn wenn die Merkel e SMS schreiwe dut, sollse flerschemerisch schreiwe, donn konns aach kooner lese.

De Karl seet: O ja, mir schigge der e Flerschemer Werrderbuch. Weil die Werrder doo droi sinn monschmol su schwer ze lese, dass aach mir Flerschemer gons langsam lese misse.

Siehsde, saach isch, unn flerschemer Werrder ze lerne unn die aach noch langsam ze lese hawwe die Amis koo Zeit. Moie schigg isch e Flerschemer Werrderbuch nooch Berlin, mett emm scheene Gruß vumm Schorsch, vumm Karl unn vumm Honnes.

Eiern Honnes.